

Na osnovu člana 9. Zakona o kantonalnim ministarstvima i drugim tijelima kantonalne uprave („Službene novine HNK,“ broj: 4/98, 1/02, 7/04 i 2/13) i člana 20. i 68. Zakona o organizaciji uprave u Hercegovačko-neretvanskom kantonu, („Službene novine HNK“, broj: 9/09), ministar Ministarstva obrazovanja, nauke, kulture i sporta Hercegovačko-neretvanskog kantona, d o n o s i

## **P R A V I L N I K**

### o dodjeljivanju stipendija i subvencioniranju smještaja u studentski dom

#### **I. OPĆE ODREDBE**

##### **Član 1.**

- (1) Ovim Pravilnikom propisuju se opći uslovi, način, postupak i kriteriji za dodjelu stipendija i subvencioniranju smještaja u studentski dom (u daljnjem tekstu: subvencija smještaja) redovnim studentima, te ostala pitanja koja se odnose na prava i obaveze korisnika stipendija i subvencije smještaja.

##### **Član 2.**

- (1) Student koji aplicira na konkurs za dodjelu stipendije i subvenciju smještaja prijavljuje se za dodjelu stipendije/subvenciju smještaja iz jedne od četiri grupe:
- I grupa** – Stipendije za studente deficitarnih zanimanja,
  - II grupa** – Stipendije na osnovu uspjeha u učenju,
  - III grupa** – Stipendije za studenta – dijete pripadnika boračke populacije i
  - IV grupa** – Stipendije u statusu socijalno ugroženih osoba.
- (2) Student može podnijeti aplikaciju za maksimalno dvije od navedenih grupa iz člana 2. stava (1) ovog Pravilnika.
- (3) Student može ostvariti pravo na dodjelu samo jedne stipendije ili subvencije.
- (4) Od utvrđenih proračunskih sredstava za stipendiranje studenata, ministar za svaku akademsku godinu utvrđuje iznose novčanih sredstava namijenjenih pojedinačno za svaku od četiri grupe stipendija navedene u članu 2. stav (1) ovog Pravilnika.
- (5) Učenik generacije, student bez oba roditelja, student-dijete poginulog borca pripadnika Armije Republike Bosne i Hercegovine, Hrvatskog vijeća odbrane, policije nadležnog organa unutrašnjih poslova (u daljem tekstu:“Oružane snage“) i student 100% invalid, dobiva stipendiju u skladu sa članom 10. stavom (3) ovog Pravilnika i isti je izuzet od dijela konkursne procedure koja se odnosi na bodovanje.

##### **Član 3.**

- (1) Pravo učešća na javnom konkursu za dodjelu stipendija ili subvenciju smještaja ima kandidat koji ispunjava sljedeće uslove:
- da ima status redovnog studenta,
  - da je državljanin Bosne i Hercegovine,
  - da ima stalno prebivalište studenta i roditelja u Hercegovačko-neretvanskom kantonu (u daljnjem tekstu: HNK) najmanje godinu dana prije raspisivanja konkursa, što potvrđuju potvrdama o prebivalištu koje nisu starije od šest mjeseci,

- da nije stariji od 21 godinu kada upisuju prvu godinu studija,
- da nema bespovratnu finansijsku pomoć Ministarstva obrazovanja, nauke, kulture i sporta HNK (u daljem tekstu: Ministarstva) ili drugog davaoca (iz sredstava budžeta i vanbudžetskih fondova bilo kog nivoa vlasti u BiH, javnih preduzeća ili javnih ustanova);
- da već nema subvencioniran smještaj;
- da ne studira u inostranstvu ako takav studij, na maternjem jeziku, postoji u Bosni i Hercegovini;
- da tokom studija nije obnovio više od jedne godine, s tim da to ne može biti godina u kojoj konkuriše za dodjelu stipendije ili subvencije smještaja;
- da student studira na javnim visokoškolskim ustanovama u Bosni i Hercegovini.

#### **Član 4.**

- (1) Sredstva za stipendiranje i subvencioniranje smještaja obezbjeđuju se u Budžetu HNK-a na poziciji Ministarstva.

#### **Član 5.**

- (1) Stipendije i sredstva za subvencioniranje smještaja obezbjeđuju se za prvi i drugi ciklus visokog obrazovanja.
- (2) Izuzetak su studenti medicinske grupe nauka.
- (3) Student koji je započeo studij prije početka primjene Bolonjskog procesa finansira se do sticanja VII stepena stručne spreme.

#### **Član 6.**

- (1) Pravo na stipendiju isključuje pravo na subvenciju smještaja u studentski dom, i obrnuto.

#### **Član 7.**

- (1) Iz istog zajedničkog domaćinstva samo jedan student može koristiti pravo na stipendiju ili subvenciju smještaja.
- (2) Izuzetak je student deficitarnih zanimanja sa prosjekom ocjena većim od 8 ili 3,5, student iz porodica poginulog borca pripadnika Oružanih snaga i student bez oba roditelja.

#### **Član 8.**

- (1) Ministarstvo donosi Odluke o visini iznosa stipendije i broju korisnika stipendije za svaku akademsku godinu.

#### **Član 9.**

- (1) Ministarstvo donosi Odluku o broju studenata kojima će biti subvencioniran smještaj, mjesečni iznos subvencije, te način isplate sredstava.

## **II. STIPENDIJE**

#### **Član 10.**

- (1) Pravo sudjelovanja na konkursu za dodjelu stipendije ima student koji ispunjava uslove propisane članom 3. ovog Pravilnika.
- (2) Prijaviti se može :
  1. student koji prvi put upisuju prvu godinu studija,

2. student viših godina koji u toku studija nije imao više od jedne obnovljene godine, s tim da to ne može biti godina studija u kojoj konkuriše za stipendiju,
- (3) Od dijela konkursne procedure, odnosno od bodovanja po kriterijima iz člana 22., izuzima se:
- student prve godine studija koji je upisao studij po završetku srednje škole, a proglašen je za đaka generacije u nekoj od srednjih škola na području HNK;
  - stipendist Ministarstva koji dostavi dokaz da je redovno upisao narednu godinu studija;
  - student sa prosječnom ocjenom studija 10,00 ili 5,00;
  - student bez oba roditelja,
  - student - dijete poginulog borca pripadnika Oružanih snaga i
  - student 100% invalid.

#### **Član 11.**

- (1) Student korisnik stipendije treba redovno, bez zaostajanja, upisivati zimski i ljetni semestar i Ministarstvu dostaviti dokaz u vezi s tim, ili u suprotnom gubi pravo na stipendiju.

#### **Član 12.**

- (1) Ministarstvo nema obavezu obezbijediti posao korisniku stipendije nakon završenog studija.

#### **Član 13.**

- (1) Korisnik stipendije, u slučaju kada je to potrebno i uz saglasnost Ministarstva, ima obavezu raditi u ustanovama HNK-a onoliko godina koliko su primali stipendiju.

#### **Član 14.**

- (1) Ukoliko korisniku stipendije nije ponuđena mogućnost zasnivanja radnog odnosa u struci na prostoru HNK-a u roku od jedne godine od dana završetka studija, prestaju mu sve obaveze po osnovi stipendije prema Ministarstvu.
- (2) Ako korisnik stipendije zasnjuje radni odnos izvan HNK-a u roku od godine dana od završetka studija, bez saglasnosti Ministarstva, dužan je vratiti cjelokupan primljeni iznos stipendije u roku usaglašenim sa Ministarstvom.

#### **Član 15.**

- (1) U slučaju da korisnik stipendije želi koristiti stipendiju drugog davaoca, dužan je u roku od trideset (30) dana obavijestiti Ministarstvo o raskidu ugovora, ili ako koristi stipendiju drugog davaoca dužan je vratiti cjelokupan primljeni iznos stipendije u roku usaglašenim sa Ministarstvom. Izuzetak su studenti iz člana 2. stava 5 ovog Pravilnika.

### **III. SUBVENCIONIRANJE SMJEŠTAJA U STUDENTSKI DOM**

#### **Član 16.**

- (1) Pravo sudjelovanja na konkursu za subvencioniranje smještaja ima student korisnik usluga studenskih centara (domova) u F BiH čije je prebivalište izvan područja jedinice lokalne samouprave na kojoj se nalazi studentski dom i koji je zadovoljio uslove iz člana 3. ovog Pravilnika.

#### **Član 17.**

- (1) Pravo na subvenciju smještaja, direktno uz ispunjenje uslova iz člana 16., bez bodovanja po kriterijima iz člana 22., ostvaruje:
- student prve godine studija koji je upisao studij po završetku srednje škole, a proglašen je za člana generacije u nekoj od srednjih škola na području HNK,
  - student korisnik subvencije smještaja uz uslov da dostavi potvrdu fakulteta o redovnom upisu naredne godine te potvrdu da je korisnik usluga studentskog doma,
  - student sa prosječnom ocjenom studija 10,00 ili 5,00,
  - student bez oba roditelja,
  - student - dijete poginulog borca pripadnika Oružanih snaga i
  - student 100% invalid.

#### **Član 18.**

- (1) Student, koji ostvari pravo na subvenciju smještaja, obavezan je dostavljati potvrdu o redovnom upisu zimskog i ljetnog semestra zajedno sa potvrdom o statusu studenta korisnika usluga studentskog centra, ili u protivnom gubi pravo na subvenciju.

#### **Član 19.**

- (1) Uplatu sredstava za subvenciju smještaja Ministarstvo može vršiti na račun studentskog centra ili pojedinačno na račun svakog studenta koji je ostvario pravo na subvenciju smještaja, o čemu Odluku donosi Ministar.

#### **Član 20.**

- (1) Za uplate Studentskim domovima potrebno je da isti ispostavljaju mjesečne račune (zahtjeve) Ministarstvu za smještaj studenata kojima je Odlukom odobrena subvencija, do 15. u mjesecu za prethodni mjesec, sa priloženom listom studenata korisnika usluga.

#### **Član 21.**

- (1) O svim promjenama po pitanju korisnika prava na subvenciju, uprava studentskog centra će biti pravovremeno upoznata od strane Ministarstva.

### **IV. KRITERIJI ZA DODJELU STIPENDIJA I SUBVENCIONIRANJE SMJEŠTAJA**

#### **Član 22.**

- (1) Kriteriji za dodjelu stipendija i subvencioniranje smještaja su sljedeći:
- (a) opći uspjeh iz srednje škole (za studente prve godine);
  - (b) prosjek ocjena svih položenih ispita (za studente ostalih godina);
  - (c) deficitarnost zanimanja (Odlukom utvrđuje Ministarstvo);
  - (d) dobivene nagrade (prethodna akademska godina);
  - (e) osvojena mjesta na takmičenjima relevantnim za studij (prethodna akademska godina);
  - (f) osvojena mjesta na sportskim takmičenjima (državna i međunarodna);
  - (g) za sudjelovanje u odobrenim stručnim i naučnim projektima i za objavljene radove i knjige, relevantne za studij (prethodna akademska godina);
  - (h) pripadnost boračkoj populaciji (dokaz nadležne službe);
  - (i) socijalni status i otežani uslovi života (dokaz nadležne službe);

- (j) srodstvo;
- (k) ostalo.

### Član 23.

(1) Broj bodova po kriterijima utvrđenim u prethodnom članu je:

- a) opći uspjeh iz srednje škole - za studente prve godine, čiji je prosjek ocjena općeg uspjeha I, II, III, IV razreda i mature - završnog ispita, slijedeći:

#### **prosijek ocjena**

- 5,00	50
- od 4,50 do 4,99	30
- od 3,50 do 4,49	15
- od 2,50 do 3,49	5

- b) prosjek ocjena svih položenih ispita - za studente ostalih godina studija:

#### **prosječna ocjena**

- 9,00 - 9,99 ili 4,26 - 4,99	65
- 8,00 - 8,99 ili 3,50 - 4,25	50
- 7,00 - 7,99 ili 2,76 - 3,49	35
- 6,01 - 6,99 ili 2,01 - 2,75	20

- c) deficitarnost zanimanja 25

- d) za dobivene nagrade
  - za nagradu rektora 25
  - za nagradu visokoškolske ustanove 15

- e) za osvojena mjesta na takmičenjima relevantnim za studij:

<u>nivo</u>	<u>mjesto</u>	
HNK	1	4
	2	2
	3	1
FBiH	1	6
	2	4
	3	2
BiH	1	8
	2	6
	3	3
međunarodna	1	10
	2	8
	3	5

f) za osvojena mjesta na sportskim takmičenjima:

<u>nivo</u>	<u>mjesto</u>	
BiH	1	10
	2	8
	3	6
međunarodni	1	12
	2	10
	3	8

g) za sudjelovanje u odobrenim stručnim i naučnim projektima i za objavljene radove i knjige, relevantne za studij:

- sudjelovanje u odobrenim stručnim i naučnim projektima relevantnim za studij
  - za svaki projekat 5
- objavljene radove i knjige, relevantne za studij:
  - za objavljenu knjigu 10
  - za objavljeni rad 5

Za koautorski rad ili knjigu bodovi se dodjeljuju proporcionalno broju koautora.

h) dijete pripadnika boračke populacije:

- student dijete umrlog RVI 30
- student dijete umrlog demobilisanog borca 30
- student dijete dobitnika ratnog priznanja I grupe 25
- student dijete dobitnika ratnog priznanja II grupe 23
- student dijete dobitnika ratnog priznanja III grupe 21
- student dijete RVI I, II, III grupe 25
- student dijete RVI IV, V i VI grupe 23
- student dijete RVI VII, VIII, IX i X grupe 21
- student dijete demobilisanog borca/branitelja 20

i) socijalni status i otežani uslovi života

- student invalid sa stepenom invaliditeta 70% i više 20
- student invalid od 30% do 70% 15
- student kojem su oba roditelja nezaposlena 20
- student korisnik socijalne pomoći ili korisnik narodne kuhinje 17
- studenta izdržava samohrani roditelj (jedan roditelj umro, nestao, nepoznat), a da taj roditelj nije iz kategorije poginulog, umrlog demobilisanog borca pripadnika Oružanih snaga ili umrlog RVI) 12
- student čiji je jedan roditelj nezaposlen 10

j) srodstvo

- student ima brata i/ili sestru redovnog studenta 6
- student ima brata i/ili sestru, redovnog učenika srednje škole 5
- student ima brata i/ili sestru, redovnog učenika osnovne škole 4

Bodovi po osnovu tačke e), f), h) i i) se koriste samo po jednom osnovu.

k) ostalo:

- student studira na visokoškolskim ustanovama studij koji ne postoji na maternjem jeziku na području HNK 5

Status studenta – djeteta poginulog borca, studenta - djeteta umrlog RVI i studenta – djeteta RVI dokazuje se uvjerenjem općinske - gradske službe za BIZ koje ne može biti starije od šest (6) mjeseci.

Status studenta – djece drugih kategorija boračke populacije dokazuje se uvjerenjem općinskih – gradskih grupa za pitanja vojne evidencije.

Student – dijete iz kategorije boračke populacije boduju se po jednom osnovu, a koji se odnosi na bodove po osnovu pripadnosti boračkoj populaciji.

Samohranim roditeljem u smislu ovog Pravilnika smatra se roditelj koji ne živi u bračnoj ili vanbračnoj zajednici i sam se brine za svoju djecu. Status samohranog roditelja dokazuje se izvodom iz matične knjige umrlih (za umrlog roditelja) ili izvodom iz matične knjige rođenih (ime jednog roditelja).

#### **Član 24.**

- (1) Pri bodovanju kandidata za subvenciju smještaja, broj bodova iz člana 22., pod tačkom h) (*pripadnost boračkoj populaciji*), tačkom i) (*socijalni status i otežani uslovi života*), tačkom j) (*srodstvo*) i tačkom k) (*ostalo*), množi se koeficijentom 1,5.

#### **Član 25.**

- (1) Prije raspisivanja konkursa za dodjelu stipendija i subvencioniranja smještaja, Ministarstvo može odlukom, utvrditi i dodatne kriterije.

#### **Član 26.**

- (1) U slučaju da dva ili više studenata imaju jednak broj bodova, prednost ima kandidat s većim prosjekom ocjena, a ukoliko su izjednačeni i po ovom kriteriju, prednost ima student koji ima više bodova po osnovu socijalnog statusa ne uzimajući u obzir odredbe člana 24. ovog Pravilnika.

### **V. POSTUPAK ZA DODJELU STIPENDIJA ILI SUBVENCije SMJEŠTAJA**

#### **Član 27.**

- (1) Odluku o raspisivanju konkursa za dodjeljivanje stipendija i subvencioniranje smještaja donosi Ministarstvo.
- (2) Konkurs se objavljuje na službenoj stranici Ministarstva i na službenoj stranici Vlade HNK uz obavještenje u sredstvima dnevnog javnog informisanja.
- (3) Konkurs sadrži podatke o općim uslovima i kriterijima za dodjelu stipendije ili subvencije, rok za podnošenje prijave, popis dokumenata sa potrebnim dokazima o ispunjavanju uslova konkursa, te naziv i adresu organa na koju se prijave podnose.

#### **Član 28.**

- (1) Kandidat je obavezan da aplicira putem *on – line* obrasca, da isti isprinta, potpiše i dostavi zajedno sa ostalom potrebnom dokumentacijom.

- (2) Kandidat može aplicirati na maksimalno dvije od četiri ponuđene grupe iz člana 2. stava (1) ovog Pravilnika.
- (3) Ukoliko kandidat ne dostavi potrebne dokaze za svaku od stavki pojedinačno, neće biti izvršeno bodovanje istog po stavci za koju ne dostavi dokaz.
- (4) Prijava na konkurs kandidata neće biti razmatrana ukoliko se utvrdi da za istu nedostaju tri (3) ili više dokaza.
- (5) Sastavni dio *on – line* obrasca je i izjava kandidata kojom pod materijalnom i krivičnom odgovornošću garantuje tačnost dostavljenih dokaza.
- (6) Prilikom popunjavanja *on – line* obrasca kandidat će zadužiti šifrirani kod.

#### **Član 29.**

- (1) Konkursnu proceduru provodi komisija od pet (5) članova koje imenuje Ministar.
- (2) Zadatak Komisije je razmotriti sve prispele prijave, neblagovremene i nepotpune odbiti, a za blagovremene i potpune prijave provjeriti bodovanje po utvrđenim kriterijima i bodovima iz člana 22. i 24. ovog Pravilnika.
- (3) Komisija je dužna sačiniti bodovnu listu o dodjeli stipendija odnosno subvenciji smještaja, istu dostaviti Ministarstvu, sve u roku od trideset (30) dana od dana zatvaranja konkursa.
- (4) U slučaju bilo kakvih nejasnoća Komisija može tražiti od kandidata i ustanova dopunu podataka ili provjeru dokaza.

#### **Član 30.**

- (1) Lista studenata sa bodovima iz člana 28 stav 6, koji ostvare pravo na stipendiju ili subvenciju smještaja, objavljuje se na službenoj stranici Vlade HNK i na oglasnoj tabli Ministarstva.

#### **Član 31.**

- (1) U roku od pet dana (5) od dana objave liste iz člana 30. studenti mogu uložiti prigovor.
- (2) Prigovor se podnosi ministru Ministarstva.

#### **Član 32.**

- (1) Nakon riješenih eventualnih prigovora ministar donosi konačnu Odluku o dodjeli stipendija u akademskoj godini, odnosno Odluku o subvencioniranju smještaja.

#### **Član 33.**

- (1) Izuzetno, ministar može Odlukom dodijeliti stipendiju i odobriti subvencioniranje smještaja redovnom studentu.

## **VI. PRAVA I OBAVEZE KORISNIKA STIPENDIJE ILI SUBVENCIJJE SMJEŠTAJA**

#### **Član 34.**

- (1) Na osnovu Odluke iz člana 32. zaključuje se ugovor između Ministarstva i studenta.
- (2) Ugovorom se posebno preciziraju visina i način isplate stipendije, odnosno način isplate subvencije smještaja, te prava i obaveze ugovornih strana.

#### **Član 35.**

- (1) Student nema pravo na stipendiju ili subvenciju smještaja ukoliko koristi stipendiju drugog stipenditora.



- (2) Pravo na stipendiju ili subvencije smještaja također nema student koji je u radnom odnosu, ili se zaposli tokom stipendiranja, odnosno ukoliko tokom jedne akademske godine stipendiranja ili subvencioniranja smještaja ostvari po bilo kojem osnovu primanja u iznosu većem od ukupne sume sredstava koja se isplaćuju za tu akademsku godinu na ime stipendije odnosno subvencije smještaja.

#### **Član 36.**

- (1) U slučaju ispunjenja nekog od uslova iz prethodnog člana, student je dužan o istom obavijestiti Ministarstvo, uslijed čega će biti obustavljena daljnja isplata stipendije odnosno subvencije.
- (2) U slučaju da student ne obavijesti Ministarstvo o ispunjenju nekog od navedenih uslova, a Ministarstvo dobije informaciju o istom, pored obustave daljnje isplate student će biti dužan izvršiti povrat isplaćenih sredstava na ime stipendije odnosno subvencije smještaja u toj akademskoj godini.

#### **Član 37.**

- (1) Student, korisnik stipendije ili subvencije smještaja, dužan je na početku svakog semestra priložiti potvrdu o upisu, u suprotnom gubi stečeno pravo.

#### **Član 38.**

- (1) Studentu korisniku subvencije smještaja, u slučaju prvog obnavljanja godine tokom korištenja prava na subvenciju, ista se umanjuje za 50%, a u slučaju druge obnove u toku studiranja, gubi pravo na subvenciju.
- (2) Ostala prava i obveze regulišu se ugovorom.

#### **Član 39.**

- (1) Student ima pravo na stipendiju za vrijeme prekida studija, u opravdanim slučajevima, utvrđenim važećim propisima.
- (2) Student je dužan dobiti saglasnost Mnistarstva u slučaju stava 1.

#### **Član 40.**

- (3) Student može koristiti stipendiju i subvenciju smještaja maksimalno 6 mjeseci tokom trajanja apsolvetskog staža.

## **VII. PRELAZNE I ZAVRŠNE ODREDBE**

#### **Član 41.**

- (1) Stupanjem na snagu ovog Pravilnika prestaje da važi Pravilnik o dodjeljivanju stipendija, zajmova, naknadi dijela troškova školarina i subvencioniranju smještaja u studentskim domovima („Službene novine HNK“, broj: 1/10, 2/10, 6/10 i 08/11).

#### **Član 42.**

- (1) Ovaj Pravilnik stupa na snagu narednog dana od dana objave u „Službenim novinama“ Hercegovačko-neretvanskog kantona.

Bosna i Hercegovina  
Federacija Bosne i Hercegovine  
Hercegovačko-neretvanski kanton  
Ministarstvo obrazovanja, nauke, kulture i sporta

Broj: 05-01-02-2515/17  
Mostar, 16.10.2017. godine  
MINISTAR  
dr. sc.RašidHadžović,s.r.